

**Kalaallisut oqaatsitta qanoq tusagassiuutini nukittorsarneqarsinnaanerannik qaffassar-neqarsinnaanerannillu apeqquteqaat aallaavigalugu oqallisissiaq**  
(Inatsisartunut ilaasorta q Mimi Karlsen, Inuit Ataqatigiit)

**Akissuteqaat**

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Naalakkersuisut Kalaallisut oqaatsitta qanoq tusagassiuutini nukittorsarneqarsinnaanerannik qaffassarneqarsinnaanerannillu apeqquteqaat aallaavigalugu oqallisissiatut siunnersuummut qujapput.

Siunnersuuteqartoq tusagassiorfinnit kalaallisut oqaatsitta atugaanerat pitsanngorsarniarlugu sulissuteqarnissamik siunnerfeqarpoq, maannakkullu suliffeqarfiit oqaatsinut tunngasunik suliaqartut innersuussutigalugit.

Naalakkersuisut tamatigoortumik oqimaaqatigiissaakkamillu aallakaatitsisarnissamut isumaqatigiissutissaq tulliuuttoq KNR-imut isumaqatigiinniutigalugu aallartippaat, ukiunut 2015-imiit 2018-imut atuuttussa. Isumaqatigiinniarnernut tamakkununga atatillugu KNR-ip aallakaatittagai aallakaatitsisarneralu isummerfigineqassapput, pingaartumik kalaallit oqaasii atorlugit aallakaatinneqartartut amerlanerulernissaannut periarfissat ilanngullugit. Taamatuttaaq radio tv-lu pillugit inatsimmi aalajangersagaqarpoq KNR tigussaasumik oqaatsinut politikkeqarnermigut kalaallit oqaasiisa ataannarnissaannut ineriartortinneqarnissaannullu suleqataassasoq.

Naalakkersuisut siunnersuut oqaaseqarfigisassanngorlugu KNR-imut Oqaasileriffimmullu nassiunnikuuaat.

Naalakkersuisut isumaqarput aviisit ataatsimut isigalugu tusagassiornermut atortorisaminni tamani oqaatsitsinnik pitsaasumik atuisartut. Aammattaarmi nunatsinni tusagassiaminnik sapinngisamik amerlanerpaanut apuussisarnissaat pisariaqartinneqarpoq.

KNR-ip KNR-imi kalaallit oqaasiisa atugaanerisa pitsaassusiat qaffassarniarlugu sulissutigaa. Kukkunerit annikitsunnguilluunniit maluginiarneqartarput aallakaatitassaannut ajorseriaataasarmata. KNR siunnersuisartunik allaneersunik piginnaasalinnik ikiortissarsiulersaarpoq. Siunnersuisartut ulluinnarni radio-mik tv-millu atuinerimikkut malinnaavigissavaat kalaallit oqaasii KNR-imi qanoq atugaanersut KNR-imilu inuit attaveqarfigisartakkatut toqqakkat aqutitigalugit isumasioqatigiittarnernilu oqaatsinik atuinerup allanngoriartorneranut pingaarutilimmik sunniuteqassallutik. Siunnersuisartut KNR-imi aalajangersimasumik atorfinitsinneqassanngillat suliarisartakkatillu isumaqatigiissutillu malillugit aningaasarsiaqartitaassallutik, tassa taamatut suliaqarnissaq aallartinneqariarpat.

KNR-ip oqaatigaattaaq siunnersuisartut taaneqartut suleqatigalugit KNR-imi oqaatsinut tunngasunik ingerlatsinertik ineriartortinniarlugu, oqaatsit qanoq atorneqarnissaannut tunngatillugu KNR-imi oqaatsit atugaanerannut tunaartarisassat aamma KNR-ip tamatigoortumik oqimaaqatigiissaakkamillu sullissinissamut pisussaaffiinit tunngatillugu ineriartortinneqarnissaat qulakkeerniarlugit.

Oqaasileriffimmiut nuannaarutigaat naalakkersuineramik suliallit kalaallit oqaasiisa atugaanerat soqutigimmassuk tamakkunungalugu tunngasut inatsisartunit oqallisigineqartarmata. Oqaasileriffimmiit oqaatigineqarpoq kalaallit oqaasii amerlaqisunut atatillugu kukkusumik eqqoqqissaanngitsumillu atorneqartartut oqaatsinillu atuinermi kukkoqattaarnerit oqaatsinut siunissami kinguneqarnerlussinnaasut.

Oqaasileriffimmiut oqaatigaat suliffeqarfinnut oqaatsinik sulialinnut tunngatillugu ataqatigiissaakkanik pitsaasunillu tunngavissiisoqartariaqartoq. Kalaallit oqaasiinik ilinniartitsinerup nukittorsarneqarnissaa qulakkeerneqartariaqarpoq, pisariaqarporlu tamakkuninnga neqeroorutit pitsaalluinnartuunissaasa pilersinneqarnissaat qulakkeerneqarnissaallu. Kalaallit oqaasiisa ilinniartitsissutigineqarnerat pingaartumik oqaasilerinermik suliassartai eqqarsaatigalugit ajorluinnartumik inissisimavoq. Assersuutigalugu ilinniartitsisunngorniat ilinniartitaaneranni kalaallit oqaasiinik ilinniartitsisussat ilinniartitaanerata pitsaanerulersinneqarnissaa aamma kalaallit oqaasiinik oqaasilerinermik ilinniartitsinermi ilinniartitsinermut atortussat pisariaqartinneqartut eqqortullu piginissaat assut pisariaqartinneqarput.

Tamakku Naalakkersuisut Ilisimatusarfimmut oqaloqatiginnissutiginiarpaat, ilinniartitsisunngorniat ilinniartitaanerannik maannakkut nalilersuineq ingerlasoq pillugu nalunaarussiaq saqqummiunneqariapat oqallisigineqaleriapallu.

Maani inuiaqatigiinni kukkusumik oqaatsinik atuisarnermut tunngatillugu ajornartorsiutaasut ataatsimut isigalugu soqutigineqartorujussuupput. Taamatullu oqaaseqarlunga Inatsisartunut oqaluuserisassanngortitsivunga kingunissalimmillu oqallilluartoqarnissaa qilanaaralugu.